

Fasnacht 1993



Schnuderbeeri

D'Füürwehr duet dr Notfall probe
per Zuefall grad am Eggen obe
Dr Weller muess dä Ysatz leite
losst Zielsetzig schnäll loh verbreite
«Feuer löschen — so schnell wie's geht,
bin im Scotch-Club — auf Pikett».


Är syg dr Cousin vo sym Tanti
und sie vom Grosi ä Verwandti
Sie isch no d'Schwöschter und dasch schad
mäh merggt an däm Verwandtschaftsgrad
das, mit däm Issler-Honegger Clän,
mit z'Muttez ä Vetterliwirtschaft hän.

Dr Umwältschutzbeamti goht
will är sy Umwält nümm verschoht
au d'Mitarbeiter düege bocke
liesse ihn im Saich loh hocke
will die alltag bim Fudiputze
kai Umwält-WC-Papier benutze.

Santichlaus du liebe Maa
Schängg mer au ä Grättimaa
ein mit Bei und schönen Ärm
denn han ich dy bsunders gärn
und zum Dangg — will y dy belohne
darfsch du jetzt im Kreisel wohne.

Die Pryse do inne — die machen is muff
ä halbs Vermöge längt nid für ä Suff
Mit em letschtä Schtutz, aber do chasch wette
chaufe mir uns sone Schperrguet-Vignette
und den hämmer numme noh s'Beschträbe
die am Jenny Kurt uff d'Schtirne z'chläbe.

Vor ganz genau 1200 Johre
isch d'Gmein Muttenz do gebore
und sythär wartet me vergäbe
i glaub au nit, dass mir's erläbe
die z'Muttenz lang ersehnti Stund
wo n'a rächti Zyttig use chunnt.



Schnitzelbänk

D'Furzidee

D'Schwiegermuetter seit zum Ma
los Ma vo morn a chunsch denn dra
jä gottfriedstutz und nundefane
ä neue Mantel muess jetzt ane
mä verlangt vo mir i finds unghür
i dämm Mantel Abfallsackgebühr

Dr Otti Stich het e Karte bicho
wenn Gäld muesch ha chasch zu mir cho
es got mr guet i bi au gsund
gniess s'Läbe ha Fraue und e Hund
rauch dr bescht Tuback und föhl mi frei
mit liebe Grüess dr Werner Rey

Isch s'Honegger Lotti genetisch gseh
verwandt mit em Issler oder no meh
druff abe hett's e Drama geh
wär mit wämm wi viel o jeh
doch s'allerschlimmschti wo isch g'sche
jetzt mien mir alli beidi neh

Es seit dr Gartebauverein
mir mache e Wettbewärb für d'Gmein
und z'günne git's di goldig Lus
für die schönschte Blueme vor em Hus
s'nächst Johr will dr Sutter-ein starte
wär het di höchsti Muur im Garte

Bim Sportverein schreit ein o Leck
di Schutter si denn fuuli Säck
als Transfer griegsch i gseh scho rot
für di no höggschtens Wurscht mit Brot
ab dämm Johr muesch jetzt chunnt s'Fatale
für die no Sackgebühre zahle

D'Prinzässin Fergie het e Männergschleif
und dr Charles luuks for another wife
er schwätzt vo Sex und zämme penne
vor Scham het's Schlössli afo brenne
zum Glück het er königs-blaus Bluet i dä Pore
susch bechiemt dä sicher roti Ohre.

dr Friedel

Z'Muttez uff dr Finnebahn,
doo hei mir welle tschogge.
Dört traffe mir e Tschogger a,
wo tuet schtatt tschogge, hogge.
Är luegt uns a mit grosse Auge,
s'isch glaub e bitz e Stolze,
schiinz warti är uff d'Bürgergemeind,
wo doo ändlig sott holze.

Als Wasserfahrer hän die Zwei,
an mängem Wettkampf gwunne
und am Bach vo Sieg zu Sieg,
mäng's Rüschi heime brunge.
Doch alles goot e mol verbi
an Schtachel wänn si nümme.
Drum mäldet euch bim Gmeindiroot,
und lehret die dört schwümme.

Deggeli – Büchse – Unterhose
Sogge und au Binde.
Alles wo d'nümm bruche chasch,
losch imene Sagg verschwinde.
S'türschi dra – isch d'Winiette,
d'Idee chönnt si vom Villiger
Drum bschtelle mir dr Grollimund,
denn chunnt eus d'Abfuuer billiger.

Z'Muttez an der Hauptschtroos unde
isch e neue Lade.
Chasch Schpieli ha, s'heisst Ludothek,
Mikado isch si Name.
Beamtemikado uff dr Verwaltig,
wird gschpielt – das chunt uns z'Ohre.
Dr Erscht wo sich bewege tuet,
dä het das Schpiel verlore.

Är isch bi dr Fүүrwehr gsi
und isch im Dorf bekannt.
Bi jedem Fүүr isch är au gsi,
sogar im Sunntigsgwand.
Im Schiiclub – Chochclub – Buurehuus
goot är au vil y und us.
Für Jung und Alt macht är dr Lappi,
eusi Gysi Schaggi.

Passbilder fertig in Sekunden

FOTOSTUDIO
SUTER

St. Jakobstr. 28 · 4132 Muttenz · ☎ 61 1110

Methinenseler: Ab in Sagg

Dr Gmeinroot duet im Dorfblatt kund,
är grolli wägem Grollimund.
Denn Abfall wo zum Grolli kunnt,
syg für d'Finanze gar nit gsund.

Dä Chläber dä isch
halt e Hit

Är isch viil scheener und
choschtet erst
no nyt

Wenn z'Nacht ein Segg schlitzt
isch's normalerwys e Hund
wo Hunger het zue dere Stund.
Doch filzt är Segg ganz ohni Grund,
ischs denn dr Hund vom Grollimund.

Dr Santichlaus het au e Sagg,
wenn är vom Schwarzwald kunnt.
Dr Gmeinroot bättlet: Kumm und pagg
in Sagg dr Grollimund!

Clique-Oornig
(gemäss Abfall-Oornig, Ziff. 1.3)

Die Methinenseler sind in gut ver-
schlossenen Einweggebinden so bereit-
zustellen, dass ein Aufplatzen unmög-
lich ist und für das Abfuhrpersonal gute
Greifmöglichkeiten vorhanden sind.

- Uffplatze darf der Säckle keiner,
drum draht dr Major e Container!
- E Möglichkeit zum Gryffere,
gits die bi unsere Pfyffere?

Fasnachtsstimmig dank Ziggi-Zaggi

S'git kes Gostim z'nähie dies Jahr,
mir göh alli Charivar(i).
Drum isch d'Fasnachtsstimmig nit
gross,
s'liegt kei Stoff ume, s'isch kes «Kaos».
Bis... ja, bis i d's Ziggi-Zaggi ha gseh.
Jetzt fröie-n-i mi uf d'Fasnacht je länger
je meh.
S'isch es Superprogramm gsi, s'het üs
gfalle.

Machet wyter so.

Im Name vo allne

E Fasnächtlere